

列朝詩集

丙集第十六

韓叅議邦靖 三十七首

王裕州廷陳 七十九首

胡副都績宗 一十二首

馬侍郎汝驥 一十一首

南紹興元善 五首

周按察廷用 三首

胡同知侍 六首

齊按察之鸞 三首

潘侍郎希曾 一首

戴給事銑 四首

蔡侍郎昂 一首

江京府循 一首

黃長樂瑜 一首

嘗評事倫 一十首

江僉事暉 三首

許副都宗魯 一十首

王僉事誣 一十五首

劉副使天民 三首

汪大理文盛 三首

敖布政英 七首

張賓客邦奇 一十六首

汪侍郎玄錫 一首

唐講學舉 三首

汪僉事應軫 五首

李思恩汛 一首

黃侍郎衷 一首

陳副使叔紹一首

李給事鳴鶴五首

朱員外疏一首

蕭宗二首

韓叅議邦靖

邦靖字汝慶陝西朝邑人南京兵部尚書邦奇字汝節之弟也汝慶生三歲能哦詩百餘首十四舉鄉試二十一與汝節同舉正德三年進士爲工部都水司員外郎乾清宮災詔求直言汝慶上言朝政不修盤游無度狎近群儉閉塞諫諍百度乖違閭閻流散危亂之形已成社稷之憂方大上震怒擊錦衣獄奪官爲民家居八年起爲山西布政司左叅議嘉靖二年年三十六以病自劾歸歸四月而卒汝節奇偉倜儻譚理學負經濟海內稱苑洛先生以地震死汝慶才蕪爛發風節凜然關中至今稱二韓子汝節爲汝慶立傳而謂其友樊恕夫曰世安有司馬遷關漢卿之輩能爲吾寫吾思弟痛弟之情乎王敬夫曰五泉子古詞歌浸淫唐初逼漢魏七言絕句詩類少陵朝邑志其文章之宏麗者

弄玉篇

南天鵬海飛難盡北極鰲峯鎮不搖玄圃三山金作殿青谿百仞玉爲橋

千春翠樹玄霜落九夏洪厓紫雪飄
桃花零亂常迷路彩鳳翩翩不易
十年不得青鸞信一旦還吹碧玉簫
窻前度曲通真訣竈下修丹悟浪燒
飄飄翠袖空中舉白日于飛作仙侶
騎鶴雙雙闕苑來乘虬兩兩天台去
緱山初月信梳明洛水清波雜珮聲
雲車並駕朝王母霞帳聯絲伴許瓊
人間滄海塵將滿天上朱桃果未成
弱水圍州三萬里方壺絕頂九千坪
飛去飛來烟霧裏爲雨爲雲朝暮行
翡翠蘭若不獨棲玉杯金案學齊眉
豈知寶殿嫦娥怨翻笑銀河織女思
同是神仙不同樂掩泪年年傷寂寞
玉指終朝虛度機金圭往歲空餐藥
不如且斫瀟湘竹相隨共奏鸞凰樂

採蓮曲

江南七月蓮花開江上女兒採蓮來
桃頰雙垂映秋水菱歌一曲望春臺
春臺一望隔千山征客素關更楚關
妾意如舟元不定郎行似水何時還
若耶溪雲門島江水何茫茫江風何
浩浩暮雨朝雲江上樓春蘭秋蕙江
邊草遠樹千重鴈日頻歸帆一片憂
心擣一片歸帆望不來誰家簫鼓畫
船開還看枕底鴛鴦宿又見檣頭鴻
雁回一溪還一曲採蓮採未足水清
石磊磊採蓮意已忘越女長歌不肯
休吳姬輟棹猶相待去年儂採蓮今

年蓮復採年年江上花朵鮮歲歲花中苦心在中有苦心君不知請君但
看並頭枝可憐片片同心蕊但作悠悠藕內絲官道採桑勞妾身西湖採
蓮傷妾神雲窗織罷愁長日煙嶼歌殘望遠人遠人不可見且唱採蓮歌
桂楫蘭橈下極浦青樓朱箔此山阿芙蓉苑外金鞍度楊柳隄邊玉騎過
紅塵駐馬非無意白露沾裳將奈何將奈何採蓮歸明月前溪一鏡飛珠
翠綺羅紛照耀吳謳越吹相因依明年倘若蓮花發蕩子關山莫更違

玄明宮行

長安送客城東道柳葉楊花春正早玄明宮前下馬時一片煙光長萋草
宮中道士邀我入素菓清茶日未曷白河東下楚城西指燕湖山三嘆息
正德三年與四年劉瑾專權斧戾前可憐帝主推心腹縱有丘張豈比肩
帷幄空多戚里恩論思無復侍臣尊千官盡走東河下庶政全歸左順門
震主傾朝不自知回天轉口更誰疑金貂滿座銜恩日朱紱升堂頌德時
翮嫌仇李光榮薄却笑曹侯意氣卑謀生意拙還謀死更起玄明作蒿里
甲第侯王已莫倫陰山將相那堪比土石西山半欲摧棟梁南國勸牛回
虛閣平臨金闕杪假山下指鳳城隈琪花瑤草尋常得萬戶千門次第開

千門萬戶誰甲乙
玄明之官推第一
金盞常思埋甲盾
銅駝不解生荆棘
自古威權不到頭
九重一怒罪人收
幾人烈焰俱灰滅
一旦冰山作水流
冰山烈焰事俱非
座上門前客盡稀
須臾蔓草榮枯骨
宛轉佳城屬羽衣
門掩官河十里長
山藏龍樹一千行
今古誰存三尺土
姦雄空作百年忙
春風有客時雙入
寒食何人奠一觴
臥牛不得歸崗勢
怨鶴空聞繞夕陽
夕陽漠漠鶴歸遲
却憶玄明全盛時
千人舉杵萬人和
九仞爲臺十仞池
雨露霜霏啼喜怒
層青丹碧豈珍奇
萬民累足臣屏息
四海離心主不知
從來偏重多憂患
自古末流難障捍
東京政事三公缺
闕宦專權禍尤烈
正統下振擅權時
先朝李廣亦恣睢
只今不獨劉瑾盛
帝主旁前安可知
倚社難熏古如此
操刀必割誰能已
三穴那能窮帝旁
萬機况復歸司禮
救枉扶偏本不同
更張琴瑟始成功
還期聖主思前事
莫道玄明有別宮

南山有虎北山有鳥行寄對山康先生

南山有虎不避賢
君乃以手摩其顛
北山有鳥文彩鮮
君之毛羽何翩翩
昔人曾忌直如弦
况有高才朝士前
時若憐才更容直
請子橫飛上九天

長安宮女行

不列朝詩集丙十六

長安城頭夜二鼓力士敲門稱太府爲道君王巡幸勞選取嬌娥看歌舞
應酬未終話從容堦除早已入三五倉皇便欲將我行那肯相留到天曙
平昔嬌疑在母傍黃昏不敢出前房如今却向何處去似墮淵海身茫茫
四更未絕五更連父母相隨太府前頃刻回頭同伴至亦有爺娘各慘然
雖同閨里不曾親那得相逢及此辰清泪俱含未粧面愁魂不附欲傾身
天明却轉雙輪疾送我城東坐官室生來雖在咸寧城目中誰識京兆驛
已看閨閣隔重天乍度昏朝似干日中有數人不甚愁問之乃是勾欄流
平生謔浪輕去住却說能觀五鳳樓望承恩寵心雖別思到家鄉淚亦流
纔言欲去去何忙翠幙油車已道傍少小生離還死別傍人見我空徬徨
嬌隣姊妹不得訣父母送我滄水陽相看痛哭各捨去此時欲斷那有腸
城裏家家錦繡簾我輩姿容豈獨妍東家有女如花萼且入黃金名已落
西家有女如玉瑩夜剪烏雲髮不行我輩無錢兄弟劣坐使芳年成訣別
渡河渡渭還渡汾千山歷盡雪紛紛江流山館猿常哭葉落郵亭鴈屢聞
自從墮地誰窺戶此際無家却望雲迢迢千里還藏窟大同才得到行宮
常言朝見何曾見深院蕭蕭盡日封當今天子說神武時命三邊乘六龍

近時雙驛駐榆塞不知何日來雲中轉眼還成正月末忽然大駕還沙漠
見說天壇禮未修還兼太廟春當禴京師暫欲駐纛旂屬車還載蛾眉婦
却向豹房三四月欲近龍顏真是稀宮中景色誰曾見宮外楊花徒撲面
有眼但識鴛鴦死有身那到麒麟殿風舟時泛西海渚採蓮不喚如花女
鸞駕常標內教場何曾湯火試紅粧茶飯每排新寺裏不用明眸兼皓齒
空有娼家迓藝高隨人望幸亦徒勞官花紅自羞粧面御柳何人闕舞腰
君王不御人轉賤盡日誰來問深院日給行糧米半升大官空有珍羞饌
旁人見我入天關謂我將承帝主恩豈知流落還愁恨榮寵何曾但泪痕
妾家雖貧未甚貧絲麻布帛亦遮身有時亦繡鴛鴦枕翠線金針度一春
一春鸞鏡不停粧機杼言忙苦不忙寒食清明邀等件銀釵羅髻亦風光
父母如同掌上珠去年才許城東夫乘龍跨鳳雖未必並宿雙棲亦不孤
百年光景誰曾見一旦榮華土不如當時同輩聞我說珠淚人人落雙頰
亦有因緣與恩愛誰無父母同家業可憐拋却入君門九夏三秋那可言
風雨苑深同白晝星河樓淺共黃昏我曹豈是無傾國聞道君王不重色
宮禁幽深誰不知歸跡民間頗堪測漢家多欲稱武皇玄宗好色聞李唐

衛氏門前誇掛客，楊釗海內無三郎。主上今來十四年，劉瑾朱寧並擅權。
往時勢焰東轍盛，近日威名遊擊偏。丘張谷馬紛紛出，那有皇親得向前。
又聞親受于永戒，大箴不御思長年。更寵番僧取活佛，似欲清淨超西天。
君王賤色分明是，那用當時詔旨傳。當時陝西有廖大，此事恐是茲人專。
滔天罪惡思罔寵，逮迎却乃進嬋娟。去年毡帳云欽取，狗馬年來俱奉旨。
何曾竟有君王詔，此曹播弄常如此。自從陝西有斯人，災禍年來何太頻。
閭里已教徒赤壁，關關還遣閉青春。青春零落不須論，別有淒涼難具陳。
同來女伴元不少，一半已爲泉下塵。妾身雖在那常在，溝渠會見骨如銀。
誰家願作朝天戶，此世空爲墮地人。中朝高官氣如虎，朝廷有關爭拾補。
近時叩闕諫南巡，何不上書放宮女。先朝能夠有故事，萬一官家肯相許。

中秋同何大復望月

燕地中秋月仍看，此度明照人愁白。髮爲客嘆浮名空濶，無霄漢清光接。

禁城中原有戰士，今夕最關情。
今節他鄉酒闌山，獨夜情看花秋露。下望月海雲生碧漢，迥棧近朱樓。隔水明南飛有鴻雁，作意向人鳴。

病中送人入陝

渭水潼關北吾親舍在茲君行須此路我往未知期但報平安日休言疾病時丈夫憐少子恐遣髮成絲

憶馬百愚

雨雪思良友深杯復此斟風烟遲暮歲關塞別離心岸柳行將發賓鴻去益深那寒勞撫字或恐廢高吟

飲興隆寺分韻

萬里烟城暮相逢老衲衣盤飧無肉食計有柴扉病骨春仍健浮名靜覺非紛紛明日事潑倒夜深歸

聞雁

鳴雁蕭蕭下寒燈故故明角聲傳細雨雲色渡高城兄弟無書信乾坤有甲兵秋風啼未得見爾不無情

雲中九月八日同張年兄字川登高

佳節明朝是遶寒花未開愁心看極塞鄉思上高臺對酒清筵咽當歌白雁來天涯難會雨風雨復相催

憶馬侍御

濁酒對清夜停雲懷古人才高翻不偶多難轉相親鴻雁看南國風雲望北辰莫因秋節至傷爾別離神

關中二首

不得秦中信今傳關內兵饒荒失撫御盜賊遂縱橫渭北何由定商南豈可行不知今日將誰是漢長城
蜀寇金州入胡兵鐵騎連風塵逃故國消息斷殘年劔月明三輔烽雲散
八川西征推總制勿使聖心懸

寄苑洛兄

兄弟江南北時違悵望深共爲餬口計常有畏人心但可開家釀無勞問遠岑團圓歸計是早晚與同尋

席上聞歌分韻

絃管青春劇長安好事家已聞音振木知有面如花院靜來疑近風迴去
轉除朱樓在縹緲空復側烏紗

破賊

破賊安平日俱傳靡子遺近聞屯霸上復似渡淮時平野旌旗合川原鼓角悲中丞欲全勝且未發偏師

葉家樓武皇北巡曾此駐驛

一曲朱闌倚綠楊葉家樓閣本尋常曾看萬國來佳麗不信當年獻帝皇花繞香雲選五色草和秋露但斜陽江南江北無窮恨八駿源誰馭穆王

秋日

水瘦江空潮漸平卽看秋色老霜橙雪籠淡日晴無定風剪疎林寒有聲殘菊蕭條他自發暮烟飄渺傍愁生朱欄欲共何人倚萬里長天一雁橫

感事 正德丁卯

東南民力知全竭西北長城更欲修定有壯丁填野壑况兼新麥在平時尋常功業人知好十萬人心或可憂白屋書生真過計便因家國泪橫流落落乾坤一病身偶聞時事倍傷神內批時復傳中旨故里尤多賜老臣敢謂履霜憂杞國已從人日驗今春匡扶未有繼毫力名位誰居第一人

北上

萬木蕭蕭共別離此行未敢卜歸期還鄉夢怯關山遠戀土情深花竹知

滿榻閒雲憐去後半窗風雨憶當時不知他日庭前鳥還上空槐第幾枝

秋雨

雨到秋深易作霖蕭蕭難會此時心滴堦響共蛩鳴切入暮涼隨夜氣侵江濶雁聲來澗渺燈昏官漏夜沉沉蕭條最是荊州客獨倚高樓一醉吟

送周世寧還

離亭落日照秋盃愁共寒花各暫開別去幾時還再見交遊如子實多才洞庭木葉秋仍下巴峽猿聲今正哀鴻鴈南飛還北上可能無意寄書廻

谷太監出軍歌

五千精銳下良鄉雲裏旌旗闐日光諸將不知中使貴夜來馬上別君王

聖上西巡歌八首

宮車七月度居庸天子巡邊御六龍胡虜還藏三萬里却鳴金鼓下雲中
海日遙凝上將袍胡霜不及侍中刀兵臨瀚海冬無雪騎轉陰山馬正驕
聖皇神武自天成遊擊兵威舊有名一騎獨馳三百里日斜同上廣羊城
內髻宮釵出近臣娥眉處處捧龍鱗北京雖有中秋月西上還看十月春
邊軍隨駕盡鷹揚馬上文臣亦武裝雲繞旌旗來五柞春隨簫鼓到長楊

渥洼龍馬屬天閑
沙苑牛羊入大官
八府三邊俱望幸
九重十月未回鑾
去年宣府建行宮
今歲榆林駐六龍
聞道巡關張御史
曾召聖駕在虜窟
文皇宗社萬年長
形勝幽燕天下強
西伐東征俱已了
如芥芥于列坐明堂

漫成二首

漆沮河邊兩岸沙
遠隄十里盡莼花
春風縱使隨流水
落日猶堪闔彩霞
沙苑烟光近白樓
黃河清渭兩交流
牛羊落日新丘壘
楊柳春風古渡頭

春興

十里晴烟散薜蘿
輕寒乍煖試清和
柳眉杏臉莼花泪
各有春愁誰最多

常評事倫

倫字明卿山西沁水人
正德六年進士除大理寺評事
謫壽州判官遷知
寧羗州未上卒年三十
有四明卿多力善騎射
時馳馬出郊與侯家子弟
俠少年較射問知爲常評事
奉大旨爲壽輒引滿揮鞭馳去
又時過偶宿至日高春徐起
赴朝叅長吏訶之教然曰
故賤時過從胡姬飲不欲居
薄耳中考功法調判庭
警御史罷歸益縱聲伎自放
酒間度新聲悲壯豔麗善書畫
好彭老房中法謂神仙可立致
從外舅滕洗馬飲大醉衣紅氍

雙刀馳馬渡水馬顧見水中影驚蹶刀出於腹潰腸死平陽守王濬爲收
葬之有常評事集四卷其吊淮陰侯詩中原豪俠至今猶傳之

采蓮曲三首

素月開歌扇紅渠艷舞衣隔江聞笑語隱隱棹歌歸
棹發千花動風傳一水香傍人持並蒂含笑打鴛鴦
沿月並舟還荷花蓋江水咲擘齒莖開小小新蓮子

大醉後題大雲寺閣柱上

謝公昔高卧挾妓東山遊豈紫黃閣貴不顧蒼生憂替綬聊暫出江漢乃
安流國器良有待局促非吾儔

望山有懷故人

羈步局重城流觀狹四野高高見西山鄉愁莫傾寫天際望不極延佇
蕭灑落葉歸故根山雲滿楸檟無情尚有適何以慰離者

玉清宮戲題

玉函金簡數行書鶴背飄飄上碧虛群仙瑤殿收封事應笑人間久謫居
和王公濟過韓信嶺

漢代推靈武將軍第一人禍奇緣躡足功大不容身帶礪山河在丹青祠廟新長陵一抔土寂寞亦三秦

經海子

積水明人眼蕪葭十里秋西風搖雉雉晴日麗粧樓柳徑斜通馬荷叢暗度舟東隣如可問早晚卜清幽

琵琶

紅袖揮金撥朱絃繫玉肩團團懷夜月幽咽瀉春泉白雪調終宴青雲遏遠天悠悠時斷續引恨似當年

玉泉亭

武帝時乘輿金輿駐翠微至今看草樹猶似被光輝泉迸聞仙樂雲流見畫旂亭高重回首冉冉下斜暉

王裕州廷陳

廷陳字稚欽黃岡人父濟弘治間進士爲吏部郎稚欽穎慧絕倫髫年綴文不假師授好粘竿風鳶諸童子戲父挾之輒大呼曰大人奈何虛海內名士耶正德丁丑舉進士選翰林庶吉士翰林故事兩學士典司教習體

貌嚴重稚欽侯其退食樓院署檟杪窺見其起居狀大聲叫呼兩學士無
如之何祥弗知也解館拜吏科給事中毅皇帝將南狩修撰舒芬庶吉士
汪應軫要衆伏闕請留石礮城爲館師危詞沮之稚欽賦烏母謠大書玉
堂之壁礮城大慙執政聞之皆怒諷吏部出爲裕州知州稚欽旣不習爲
吏訟牒堆案漫不省視左遷失職怏怏無所發怒有所案治榜掠過當御
史監司行部不出迎謁亦不屬疾有分司鞭撻州吏錮其門絕餼食以窘
之久之乃引去自是相戒莫敢道裕州州民被案者佚出詣闕下訐奏稚
欽不法事收捕下獄削秩免歸屏居二十餘年嗜酒縱倡樂益自放廢遠
官貴人相慕好請謁者延見之多蓬髮跣足不具賓主禮時衣紅紵窄衫
騎牛跨馬嘯歌田野間嘉靖初元搜訪遺佚顧華玉撫楚以稚欽及隨州
顏木應詔不果用賜緜帛老于家稚欽有夢澤集十七卷其詩婉麗多風
爲詞人所稱而文尤長于入牘皇甫泉稱其曰顧中丞陳監察書若稽康
之絕山宰寄余懋昭舒國裳二劄卽楊惲之報會宗君子讀而悲之顏木
字惟喬稚欽同年進士知許州亦以州民詰奏下獄免官任誕自放其蹤
跡亦略倣稚欽兩人聞之交相得也惟喬詩質率了無才情而其名亞于

稚欽撰隨志雜用史法體例躡駁而顧華玉推其有良史才殆名過其實者也

白紵辭五首

高堂邃宇施翠帷蘭膏明燭散朱輝二八接武步舒遲被服姣麗光陸離
彈箏鳴瑟商羽移喜溢歡恣不自持轉盼含嬉屬所私紫觴勸君君自知
主人既醉客不辭燭滅纓絕珠履遺

朝露未晞夜霜零衆芳凋歇鷓鴣鳴逝者如斯不復停人生百年命忽傾
爲君秉燭縱遊行三星在戶參差明騰觚飛爵何縱橫垂羅映縠耀珠纓
衆中不言懷隱情色授神馳流目成士女雜坐交和歌河轉參橫奈夜何
投君漢濱之玉珮獻君洛浦之明璫感君提攜祝壽昌舜日堯年樂未央
爲君楚舞紉袖揚乍開乍合低復昂矯若白鵠雲中翔雕楹綺閣迴素光
竿瑟會節間笙簧樂極悲來起傍徨共指皎日輪肝腸烏白馬角誓不忘
吳歛蔡謳調不同衆伶合作如一宮流鄭激楚迴迴風嫋姿修態紛道從
人聲絲竹各競工燕趙齊秦射代供曜靈西藏曲未終繁燈列炬且筵紅
皎如初日輝簾櫳

娛酒沉歌費白日絕代佳人何可失若戀似矜態非一持觴遍進嬌相迫
左推右引俠氣溢簪珥墜落寧復索文牕朱綬開洞房錦衾瑤席施象床
五色雜組繫流黃複帳中薰百和香層軒曲檻俯回塘鴛鴦鴻鵠羅成行
生丁盛世福運昌四時爲樂允無疆

擬矯志篇

龍虬雖困不資鱖鰐驚鷹雖孤不匹鶩雉雖有香草當戶必除雖有仁人
在敵必誅狐白雖美炎暑必置舟車之用易地則棄蕙蘭不采無異蓬蒿
干將不試世比鉛刀以驥捕鼠曾不如狸餓夫獲璧不如得糜郭生純臣
魯連高士彼乃登臺此則蹈海寧直見伐無爲曲全寧渴而死不啜盜泉

放歌行

竊鈎者誅竊國者王仁義資亂道豈不臧解代秦者呂襲楚者黃巍魏國
君大盜在傍解謂尺何短謂寸則長此不可度彼胡可量解獸噬皆裂鳥
盡弓藏智勇旣殫軀乃見殃解諛巧爲忠直夫稱狂出門異趨毀譽何常
解樂不可極憂來無方游心冲虛以保壽康解

閭闔行

閭闔開賢人庸鳴鼓間擊鏞貢術蓄指微哉同汲清亦附滓鮮株稿藁紛
以供背叛腹媼逐翁如韋之矢十斛弓俄逐而西頃却以東退乖妄侶進
爽貞朋捷徑窘疎武仁軌罕哉通孰爲雌孰爲雄朝譽曰堯夕詆則躋臬
妃鸞蕭艾生蘭叢衆首以征吾將奚從

行路難五首

北風蕭蕭雨雪滂辭我親友之期方中閨少婦走徬徨勸君斗酒牽衣裳
道路縱橫多虎狼歲暮天寒百草黃結髮本期不下堂君獨何爲慕他鄉
東流之水不西歸宛轉蛾眉能幾時人生富貴亦有命辛苦馳奔空爾爲
縱令鼎食有別離賤妾但願共舖糜

磁石引鐵金不連餌可得魚龍不吞蠟戟雖妍不可刺明珠雖貴不可餐
水中之車何殊陸地之船玉卮無當不以注白刃倒持安用銛手中雖有
丈八矛試之井底難迴旋輕輿駕良駟途窮日暮安能前丈夫雖有磊落
才生不逢時終蒿萊

面不同兮心亦殊執一求之君何愚星有好風或好雨世人豈得均所圖
孔贇韶兮墨非樂邈叱馭兮陽回車林中亦有嗜腐鳥海上猶聞逐臭夫

此欲前兮彼則却彼所吐今此復舖促席接襟議靡愜異域殊疆志或投
達人曠視任自然小儒曲士競區區

忠信不獲顯衆人害其上世事風波紛蕩漾變化無方何可狀公旦金滕
功罔刊伏波銅柱師何壯周王漢帝豈不明讒言入耳心不諒骨肉天親
尚有疑他人豈得無遷放生命飄蓬隨所向繁華誰保不凋喪何爲坐歎
行復嗟鬱陶終日憂譏謗

四坐且莫喧聽我促節歌路難我今四十迫衰殘盛年一去何當還昔斥
爲遭絳灌怒今來豈受金張憐泰山可移志不徙寒燼從知無再然但願
長隨擊壤民優游鼓腹歌堯年

詠懷一十六首

兩儀立樞要萬事具紀綱智士運機權一童驅百羊羽重金或輕尺短寸
有長壯夫苟失據反爲豎子傷獨爾引六龍織繳連雙鶴操持貴不謬得
失詎有常始悟制人術豈在多與強

儒生峭崖岸抗顏論詩書磬折周倫類直方向朋徒吐辭厲信義皎日耀
天衢外表高潔談腹內蘊穿窬命侶發瘞子探口出含珠金椎碎腐頰青

青歌應臚聖言豈不偉反爲行劫需誦說苟非人階亂豈勝誅

擊鼓以求亡疾馳以逃影驅介以乘高驂蹇以求騁揮刃喪其柄振衣失其領趣舍昧良圖存亡在俄頃

夸名非已有禍患在須臾生命無延期昏旦有不虞拂衣舍之去矯步升天濶陟降太微堂上帝授靈符六氣備朝餐雙蚪結颺輿消玉髓我漿馮雲構我虜聖真進杯觴靈妃奏笙竽三光代列炬四海注一盃抗臂抑羲和六龍且徐徐微瞬市朝易日月曷云除名漏泰山錄鬼伯無迫驅舉手謝世人安能與爾俱

姬旦制冠裳萬古承其貲偶以衣但採奔騰裂且棄承雲本妙音鱗羽爭碎易魯門鐘鼓聲轉使爰居悻物類何續紛人已非一致躋哉尼父言盡各言其志

京洛冶遊子浮湛聲色場青驪服文輿丹組繒羅裳翱翔狹邪間順風揚芬芳高堂置廣宴曲榭闌閒房分曹效百戲作使徵名倡良庖膾肥鮮珍饌溢圓方朱華忽西逝蘭膏嗣其光客醉賦無歸宵分歌未央爲樂自今日千歲固其常安能轉念息歎息懷虞殃

達士志慷慨，貪夫思保全。有身則有患，消散固其然。伏波甘馬革，莊周快鳥鸞。用意匪一趣，大要歸明賢。愚者闇桑榆，鬱鬱坐自煎。思慮損眠食，恐懼懷冰淵。蹙向賓客，劬勩終歲年。多圖寡攸成，繁辭累其愆。展轉不獲紆，賁恨寤重泉。木槿榮一朝，日夕用長歎。

河清不可俟，川逝誰能止。朝露忌太陽，夕日愁濛汜。歌舞化塵埃，都邑生荆杞。大運厄陽九，銷毀固恒理。填海精衛勞，逐日夸父死。齊景悲牛山，晏嬰笑未已。彭殤孰短長，無生悟方始。

梧宮肆詰辯，齊楚兵始連。弦高犒晉師，鄭國賴以全。齊樂不可犯，范昭知有賢。誰云制勝術，乃在樽俎間。君子慎幾微，禍福基一言。覆水各自流，事去誠可憐。

言笑色雖親，致毒乘其昧。一旦弛周防，勺水成湍瀨。禍亂在須臾，何有細不大。牧視後者鞭，蟋蟀思其外。舟壑竟難恃，軒駟何足賴。先民亦有言，高明鬼所害。慶吊非異門，驕蹇詎能會。

元化運天地，碩輔須英雄。草昧若無侯，大業何由隆。匡時各有人，如雲附飛龍。二八贊虞庭，胥靡翊殷宗。周公出天屬，鼓乃應非熊。為猷苟切施，疎

賤靡不庸下世快舉肥斥異多引同豈乏僮僕士無媒終固窮

僂倪信無當躑躅常苦憂傷哉世路交同源終異流執手愛不淺轉面起
見難傾側忍負欺怨毒生綢繆彎弓日相向乘利來迫道薛公一獲罪賓
客誰顧留炎炎廷尉門灰寂令人愁胡越使相為安危在一舟輕薄市中
童反復誠獨羞煩思發憤隨自茲絕交遊

日月亘天塗照耀各有時榮枯若循環智巧難控持賈生愁遇鵬莊周憚
為犧糾纏誰不嬰文繡焉能辭故言用自慰虛無誠我欺得失去來間北
叟迺深知

昔聞有遊女逍遙翔碧潯交甫下請佩解贈情亦深可遇不可持變化愁
予心影滅珮亦失漢廣無由尋彫跡絕髮髯徘徊逮夕陰青島忽來過貽
我金石音憂思耿難忘寫意於鳴琴自傷非備類感激長悲吟

窮達有自然鬼神柄其施安坐值渥恩周旋失所宜佩玉乃不兆歷紐襍
抱兒上卿屬稚齒郎署淹龐眉巧宦目馬安斯言恐亦非豈無多智人往
往困蒿藜

茲歲忽云暮駕言出城闕楊柳翳白日岡岑蔽玄雲荒原離獸馳寒鳥鳴

素羣上有百尺臺下有千古墳登高一騁望思我平生親延竹久不至俛仰懷酸辛萬物靡不化千載猶茲辰驅馬復來旋誅歌聊飲醇

遣興二首

八方異風土百里殊陰晴夷夏殆天設終古難合并權家但好勝持議乖羣情孤軍病深入問罪慮無名客主既不如師老功難成常恐強弩末遂令小國輕安得長者言立談罷交兵皇惠均萬物各各遂其生

南裔雖一區嶮阻紛可憑民居寄谿谷霖雨常晝冥妻子像蛇虺魑魅冒人形沙蟲潛射影觸之喪其生古來構絕域何足煩天兵吾聞王者師無戰唯有一卒不備歸良已虧威靈地於東南缺天乃西北傾二儀有不足并包人豈能

雜詩五首

締絡寒不求縈絮暑不御嘗其不切施棄置若弗顧時節忽復及效用乃如故冥運不無代物理豈常遇功成互見奪乘時各有驚嗟哉團扇姬怨歌良已誤

手持一杯水覆地東西流榮悴有自然萬卉同一秋翩翩者誰子作色矜邀遊朝見馳華軒日暮歸山丘憂來不可知爲慮何能周貪夫昧成理磬

折將焉求天命無改施智巧誠足羞

日月競馳邁一夕復一朝臨鏡失故吾壯心潛已消聖朝棄賤士九牛亡一毛豈不希末榮所苦術不饒無能令身貴何爲使心勞莊生誠我師大

鵬寓道遙

中園種桃李不言下成蹊凝霜被原野零落愁安歸盛年有銷鑠窮達在一時便嬛途路子俯仰乍榮輝名何足賴怨毒常苦滋靈龜歎在塗雄鷄憚爲犧膏火忌自煎斯言誠可悲

羲和馭六龍馳光耀萬里一濳濛汜間沉淪不自理楚宮在昔時繁華照江水歌鐘日夕聞別榭屯羅綺運徂謀亦屈巍構積傾圯當畫狐兔翔洞房生荆杞朝雲不可招逝者誰能止流觀天地間庶悟達生旨

別張子言 四首

我友駕言邁去去之朔方晨起趨中厨爲我具酒漿長別在須臾且願盡杯觴昔爲骨肉親比翼雲中翔今當承乖違邈若參與商出門異鄉縣居世如朝霜世途轉傾側良會安可常羸馬感人情哀鳴衢路傍悲風振喬林瑟瑟傷肝腸執手不能辭淚下霑衣裳恨無凌風翰送子還故鄉

故鄉豈不思臨發中徘徊借問欲誰須重與心知遠山海高且深見面未
有期有懷今不盡相思亦何爲豈無絃歌曲調促令心悲立語未及終白
日奄忽移安得魯陽戈揮景使東馳

馳景不少待客子何可留相送不覺遠行行至河洲中有雙黃鵠飛鳴諧
匹儔驚風揚洪波散失焉能求雌雄相背飛影響日以適鳧鶩豈不多嗟
哉非我仇願言樹蕙草以解心煩憂

煩憂動我神悲歌仍躑躅鬱鬱道傍柳垂蔭昔何綠嚴霜日夜寒枝葉不
復屬四時相推斥變化一何速俗子驚聲華世儒矜結束立身多所垂年
命傷局促子其愛景光抱道在白屋

別曹仲禮四首

與君一爲別晷度逝不停奄忽二十載親串日以零短者已物化存者非
壯齡况復異鄉縣散處如晨星但言長相思豈意今合并顏鬢各已改不
易惟茲情孤鴻號朔風黃鳥聲嚶嚶飛鳥戀儔匹况乃稱友生

別子大河側見子長江濱對面但疑嘆含意慘莫陳豈無新知歡念此同
袍人扳留不須更義陽忽以淪奮身思繫日天路邈無因安能附高翮一

舉摩青曼飽者豈念饒貴者羞賤貧薄終古所尤交誼貴在伸故心苟不移何必會合頻慷慨卽長路無爲兒女仁中夜起相送白露塗我襟低頭惜分手舉頭傷辰參斗酒良不薄對之不能斟唧唧草間蟲助我揚悲吟爲君拭綠綺彈作清商音物理關人情泪下不可禁谷風刺小怨孔公贊同心延陵輕寶劍高義垂至今親交信不薄先民良可欽

泠泠山下澗童童山上松
粼粼澗中石瑟瑟松上風
波逝石不俱颺奔松莫從
物理相倚藉動息難可同
與君遊宛維矯若雙飛龍
中道悵相失末路欣此逢
旣逢不須吏去復當嚴冬
霜霰集衡軛虎豹啼林叢
子其慎桑榆勞謙以令終

園亭言懷

駸死骨誰市象焚齒自累
棄置悲團扇齟齬嘆方枘
耻隨荆橘化樂與魏瓠棄
素無金張援焉取丘園資
農圃衍世業桑麻綜歲計
實飽三士桃芳引八公桂
春原露未晞秋臬霜已被
偶緣物態感遂與神理契
晷度無能淹金石亦善散
願言齊得喪庶以紓勞瘁

歲暮雜興 十首

年往志亦減，舉來毀乃加。遂初因無悶，善後生有涯。末年慕樗櫟，存身悟龍蛇。大隱但城市，嘉遯豈烟霞。

孔公深贊護，賈生虛忌鵬。屈伸在一時，憂喜本同城。河清豈能俟，途窮安足哭。久息漢陰機，莫問成都卜。

一斥壯齡改，相知白首疎。干時計轉拙，好客資苦無。飯牛當落日，牧豕入平墟。行年忽老醜，何意逐名譽。

人情皆喜新，世路惟嘉壯。鵠寵遠見珍，薪積後居上。前魚龍陽悲，遺簪少原悵。盛年亦有移，溢恩何可仗。

寡欲處易安，抗行俗難合。巢林祇一枝，繞樹猶三匝。竟日伯陽書，經年幼安榻。閉門客座空，啓徑朋簪盍。

昔惟樂游衍，今已識耕耨。連畛東陵瓜，一頃南山豆。坐久林壑暝，歸晚妻孥候。倚樹見墟烟，就枕聞山溜。

日月處無恒，俛仰情非一。蟠泥乏龍德，悅草愧羊質。周周尚慮危，鵲鵲猶慕匹。紛紛馳突子，何不虞顛躓。

偏才互短長名家殊去取連城償燕石千金辜
魁清不識東家聖翻謂西施醜定價豈目前
知已俟身後

讒毀行見迫愁思坐不開含垢長者仁懷璧匹夫
災在鳥愧能言處木甘不材終謝金籠閉幸免匠石猜

景曜一何速志業百未酬所願則學孔吾衰不夢周
智愚各有營貴賤孰無憂松子久我欺萱草爲誰求

發裕州短歌

黯卒前來意氣雄當堦縛我囚車中颯颯驚颼動地至
城捲赤霧推丹楓城中之人走相視城外蕭蕭嘶曉轡
道上殘楊掃凍帷過鴈鳴蟬雙迸淚人生作吏何太苦
囊無一錢身被虜可憐妻子盡畏途南征白髮愁豺虎
古來玉石怨俱焚骯髒安能就珪組

楚岍吟寄牟子

楚岸長楊垂至地百鳥嬌啼春自醉晴絲冉冉墮碧空
風光頗爲遊人媚我家黃子國君住鄂王城大江東下
雲霧接滔滔應瀉故人情憶初同領南宮宴白馬青袍
花映面本期霄漢並翔翔寧知世路多更變我歸十年

前君歸十年後榮華顛倒若夢中人情翻覆無不有安能顧墮甌自令心
不開陰巖積古雪白日何當來我將振衣從子遊請君洒掃鸚鵡洲遲日
經行桃竹杖烟波搖漾木蘭舟須令漢水變春酒更遣大別爲糟丘蛟龍
自吟鶴自舞仙人鉄笛沈高樓留連坐待明月上翠娥勸飲來沙頭竹林
諸賢真瑣瑣高陽酒徒安足儔吁嗟此會難卽得使我悵望無時休君不
見楚宮寂寞臺殿荒歲歲東風開野棠三閭顛顛行吟處千古猶傳杜若
香丈夫眼底安足計君行采采莫相忘

豪士吟贈王氏

君家高樓臨漢水落日悲風白雲起門垂楊柳千萬株長條直拂洪波裏
我來繫舟古楊下秋深岸束兼葭靡此時婦思正鬱陶偶爾逢君行且止
邀我置酒開綺筵庖子擊肥兼割鮮海榴新擘寶房碎湘橘旋摘金子圓
翠袖成行獻歌舞授色知心次第前堂中食客多且賢寶刀錦帶光接聯
持觴進勸我酒四座爲壽俱萬年平原十日飲未足白首酣歌凌紫烟
自矜膂力莫與我俠氣翩翩尤擅武角弓十斛左右張蛇矛丈八盤旋舞
櫪上生駒六駿姿猛士如林不敢騎控羆鳴鞭一躍上疾馳緩步衆稱宜

男兒身手有如此壯節奇功皆可爲君不見道阻天寒行旅苦水有毒蛟
山有虎請君殺蛟兼射虎惡少紛紛安足數

少年行

長安本俠窟烈士多英風殺人帝輦側射獸上林中金羈及狡兔珠彈落
高鴻歸就博徒飲酣歌意難窮

春歌

初華錦繡舒千林望如一懷春廢機杼練素難成匹

艷歌行

青樓臨廣陌楊柳當牕垂飛來雙白鵝一步一徘徊解今日樂相樂置酒
臨前池下有蕩菖花上有松栢枝解與君初結婚不意當乖違謔言使親
疎兩心當自知能君爲東流水出門不顧歸妾爲北辰星終身無轉移
君當萬里行妾當守中閨生歸重合歡必與黃泉期

妾薄命

春風轉蕙披蘭高臺曲榭中連經堂入與張筵秦箏趙瑟俱前鳴絃度曲
雙妍輕奉純袖襖襖宛若游龍翔鸞翠盤金爵闌干呈能角技爲歡種種

脈射更端眼看陽景西馳高張蘭燭承暉車倦馬怠不辭但歌不醉無端
夜深坐促尊科含棕送意向誰衆中色授君知願言並蒂雙棲惡聞易別
輕離佇立不勝彷徨獨宿寤言難忘何以報君明璫起視銀河爛光牛女
咫尺相望終夜不成報章

大祀

香殿裊氤氳鈞天九奏聞帝臨趨袞冕神至各風雲肅肅宮壇啓依依黍
稷芬甘泉稱賦頌吾已愧雄文

駕幸南海子

南郊初禮帝上苑復誇胡虎兕先聲伏車徒翼輦趨網羅張一面部曲用
三驅侍從羣臣在應知諫獵無

駕入

鏡音傳晚甸芝火動春城一路青陽送千門紫氣迎龍轡迴國步星月扈
天行大內通穹人祥煙達旦生

溪邊晚興

萬井皆秋色千巖盡落暉暉谷喧隣牧散溪響夕漁歸初月懸楓岸餘霞戀

竹扉坐來憐夜永霜露人人衣

送王知事還蜀

佐邑已三載還家無一錢苦心成白首達命任皇天峽東秋江怒雲盤石
棧懸歸來楊子宅寂寞守吾玄

春盡

春盡人將老庭闌共獨遲絮飄兼鶴毳花落罨蛛絲石榴依琴瀉雲陰入
戶移幽懷偏水竹晚步故臨池

春日郊遊同所知

芳郊聯騎出竹苑聽鶯遷共酌陶嘉月相看憶昔年病因春事減窮益故
人憐祇恐聞題鳩花間拚醉眠

聞箏二首

楚館名娃出秦箏逸響傳徘徊芳樹側掩映雜花前雁促玫瑰柱鶯喧錦
繡筵年來哀怨切復此感繁絃

花月可憐春房權映玉人思繁纖指亂愁劇翠蛾顰投色歌頻變留賔態
轉新曲終仍自叙家世本西秦

春日山居卽事

草動三江色林占萬壑晴籬邊春木至簷際暖雲生溪犬迎船吠鄰鷄上樹鳴鹿門何必去此地可躬耕

夜坐

生事日蹉跎將如落景何馬蹄持自誦牛角扣仍歌把燭秋蛾集開簾夕鳥過長風自寥濶颯颯振庭柯

陳叟

生事緣儒誤傷心近老貧一食資弟子數口仰交親身屬工詩病鄰譏貴酒頻時瞻戶外屨多是問奇人

閒步

卜築蒼巖畔爲園碧水涯浴童依淺瀨浣女散晴沙中散林惟竹東陵圃是瓜村頭歸欲暮巾服映殘霞

病起

經旬伏枕艷陽天病起藤蘿遶戶懸少日親交魂夢裏一春花鳥泪痕邊緣溪力薄依人步課圃情多警豎眠天遣此生無俗累書籤藥裹任年年

遺悶

病起衰顏聊自媚春深笑口向誰開五男不學從渠懶三徑俱荒阻客來
日展琴書娛潦倒雨拋巾舄漬莓苔交游物化今餘幾倚杖看花首重回

夏日宴集宋寶山別墅留贈

先生堪擬葛天民築室郊原遠市塵客款閒門驚稚子自分餘酌到農人
朱華冒日明棋局翠竹含風撼角巾不覩少微雲霧裏楚江誰信有垂綸

燕京元夕曲

香車一一渡星橋翠袖雙雙引玉簫但訝遊人爭碎易不知夫婿漢嫖姚

江僉事暉

暉字景孚仁和人文昭公濶之次子也正德丁丑進士選翰林庶吉士與
同館舒芬等抗疏諫南巡拜杖幾斃館事竣當授編修以前言事授廣德
州知州召爲編修進修撰世廟用言者議簡侍從使更民事擢河南僉事
未上痰疾盛作特旨許養病歸二年卒景孚爲文鈞玄獵秘雜以古文奇
字聳牙詰曲令讀者謬根眩覽至莫能句隱口汗顏而罷徐而釋之甲之
無高論也與汴人曹嘉東楚王廷陳秦馬汝驥齊名一時有曹王江馬之

稱集名直爰子取山海經直爰山有鳥食者不妬之義以自寓也王稚欽
有詩嘲之云江生突兀揚文鋒千奇萬怪誰與同博物豈惟精爾雅識字
何止過揚雄求深索隱苦不置一言忌使流俗同令弟大篆逼鍾鼎絕響
恥作斯邕等生也爲文遺弟書一出皆稱二難並縱有楚史不可讀滿堂
觀者徒張目少年往往致譏評生也不言但捫腹好醜從來安可期豪傑
有時翻自疑請君審此無易轍聖人復起當相知

前上陵德勝門

先皇巡狩日此地卽行宮拜舞千官肅飛揚八駿雄離弓閉塞霧躡鼓振
山風今日繁華歇重過恨不窮

謝政志喜

雲戶焚魚珮烟汀放鷁舟寂寥傷白石浩蕩想丹丘掛席牽風穩垂竿颺
月流故園松竹在聊得慰窮愁

送巨石弟還京

曉麓柴扉寂秋江檜鷁催別離經落葉衰颯已寒灰露浩翔鳧迥雲凝斷
雁哀騰鸞羨修羽聊得慰摧頽

胡副都績宗

績宗字孝思一字世甫鞏昌之泰安人正德戊辰進士三甲第 人傳臚之日與二甲第一人焦黃中並特授翰林簡討黃中焦芳之子也芳敗黃中編管爲民孝思與庶吉士邵銳等俱外補判嘉定州移守潼川入爲南京戶吏二部郎中出知安慶府移守蘇州在郡才敏風流前後罕健鷗味留題徧滿湖山泉石間爲叅政于山東浙江山西爲布政于河南以右副都御史巡撫山東改理河道乘輿南狩迎駕于磁復改河南汴城行臺火引咎乞歸家居數年而有詩案之獄戶部主事王聯者孝思在河南時所笞貪令也爲戶部主事犯法當死思告訐以自脫從獄中上書指孝思聞大駕幸楚詩有穆天湘竹之語爲怨望呪咀世廟大怒捕下獄嚴分宜與恭誠力救乃得解杖三十遣歸孝思在獄中取錦衣獄中柱械之類作制獄八景詩衆爭笞孝思掣其筆孝思笑曰坐詩當死不作詩得免死耶出獄時謝榛貽之詩云白首全生逢聖主青山何意見騷人孝思將八十病杖創甚呻吟間猶口占韻以謝人謂孝思意氣殆不減蘇長公也

登天柱閣

與客上江樓橫江山欲浮雲當天柱出月傍小姑流帆外收吳楚尊前落
斗牛瀾漫忽千里倚檻思悠悠

太湖三首

茫茫四郡塵囂外渺渺五湖煙霧中若更無山天地濶縱還有石水雲空
澄潭日出漁帆集遙浦潮平賈棹通爲謝東莊王相國金庭玉柱屬三公
卽看鶴駕盤湖上擬有仙曹集洞中日月隔橋生碧海星河當戶點瑤空
天圍春樹千邨合山滸秋濤十郡通獨放扁舟領丹詔白雲深處問三公
傍海月生潮不出緣江路隔水還連兩山雲出東西樹五夜星搖上下天
洞口鱗鱗千頃玉水心島嶼萬家烟島誼花發壺觴亂太守頽然醉欲仙

林屋洞

繫馬靈宮第幾天紫霞丹竈坐群仙金庭空澗蛟龍闔玉柱玲瓏日月懸
改火欲烹山乳食掃雲初藉石牀眠隔凡不隔岳陽水黃鶴飛飛何處邊

擬古四首

驚喜君王至西華夜啓扉後車三十乘載得美人歸
收大海子北放鷹海子南馳輦且歸去今朝獵未酣

迎佛何年至駝經事功虛行官方聽法休上退之書
上馬入皇城嫖姚典整下兵猶言恩寵薄下馬坐團營

聞大駕幸楚恭記

聞道鑾輿曉渡河嶽雲縹緲護晴珂千官玉帛嵩呼盛萬國衣冠禹貢多
鎖鑰北門留統制璫璣南極扈羲和穆天人駿空飛電湘竹皇皇泪不磨
上之回

上之回自回中隴山晴秋雲空上之回自終南罷期門調雲駉上之回自
伏宮帶三觀盤六龍上之回自汾河泛樓船橫權歌上之回自瀋岳射赤
蛟導神雀上之回自大宛駕龍駒飛鳳憶居九重垂衣裳一人端拱千祀
無疆

東飛伯勞歌

東飛伯勞西飛雀佳人兩兩春相約長安游子紫霓裳垂柳飛花空斷腸
墻頭桃李爭紅白朱甍翠檻誰家宅雨餘緩轡踏芳辰急管繁絃無那春
紫騮嘶入晴烟去窈窕秦娥隔花語

許副都宗魯

宗魯字東侯咸寧人正德丁丑進士改庶吉士授監察御史歷僉事副使太僕大理少卿以右僉都御史撫保定罷歸十七年會庚戌虜警起經略昌平進副都御史巡撫遼東致仕東侯才氣宏放開府雄邊多所建置在遼東奏寢三衛北虜門市遼人賴之家本秦人承康王之流風罷官家居日召故人置酒賦詩時時作金元詞曲無夕不縱倡樂關中何棟西蜀楊石浸淫成俗熙朝樂事至今士大夫猶豔稱之

十七夜雨坐

秋雲滿空寒夜景生寥廓開簾對零雨客思轉蕭索燈明虛室幌月暗高城析天際聞遠鴻琴中悲怨崔佳人不可賞感歎秋懷惡側想明月輝梧桐坐來落

渡白溝

昔運遘屯厄恒紀變參商南風日不競朔吹益遠揚英雄各乘御龍戰血玄黃矯矯平將軍獨立當中央張弧射九日撫劍勝四方事去勛故陳志伸懶已償劫來歲月久道里未能忘仲生固有爲忽死亦其常停驂覽故壁雲鴻履戰場清川帶縈紆白骨浩縱橫惋歎不能發摠轡歌此章

至日偶然走筆

去年冬至堯母城城頭較射角弓鳴今年冬至毘陵館凍雨寒雲歲華晚
江南塞北風土殊何地何年是定居愁端豈只如官線一日長添千里餘

零陵西亭同朱大參袁楊念憲材賦

八洞探幽蹟登臺散遠心雷聲帶雨重虹影射江深山華三苗國天低八
桂林來游陪二妙詞賦總南金

遼左雪中登樓

歲抄崇朝雪天涯絕塞城凍雲連海色枯木助風聲懷土情無已登樓賦
未成梅花南國思笛裏暮愁生

三月三日作

上巳今朝是風光異往時海雲成雪易寒柳得春遲目極關山道情懸曲
水詩誰能修禊飲一沈望鄉思

醫閭春望同李戶部諸君子

醫閭發眺倚胡天遼左封疆指顧全山勢北來連靺鞨海雲東盡辨朝鮮
巖花競煖霏香雪寒草留春藹翠烟公暇暫同淹永日喜無烽火報甘泉

春日園居雨中作

南山雲霧晴長安坐惜芳菲欲向闌海燕歸遲春色暮谷鶯愁劇雨聲寒
兼添柳線垂金水濕重花梢壓繡欄安得東風開暖霽曲江走馬恣遊觀

登湖山樓

樓在齊山

近郭危樓俯碧湍倦遊孤客倚朱闌淮肥山色尊前出吳楚江流畫裏看
旅思逢秋增短鬢鄉心隨雁過長安黃花白酒登高日玉笛金笳起暮寒
城南遊覽懷古

楊柳今無渚芙蓉舊有園請看蒿里地卽是樂遊原

馬侍郎汝驥

汝驥字仲房綬德州人正德丁丑進士選翰林庶吉士正德己卯當授官
值威武南巡率同館士六七人赴闕請止罰跪闕下五日拜杖出知澤州
世廟卽位錄諫官召還爲編修歷修撰南北司業南京祭酒升禮部右侍
郎上方興禮樂創改促數諸公日聚講議仲房博覽典故平居恂恂不出
言遇集議則矢口駁正斧劈理解分宜數言之上前將大拜以病肺卒官
死無以爲歛屬吏醵錢爲庀喪事贈禮部尚書謚文簡有西玄詩集黃河

水曰仲房詩整鍊似法頗謝隊仗森然雖求之聲律未見其深亦不失爲高流也

邵園行

君不見漢家八葉神靈主繼世承平身好武誇胡罷獵長楊宮廣苑還開上林土上林奢麗帝城東勅號新莊錦繡叢連袤雖無百里大蟻噪亦有三山崇雄模遠勢跨京闕萬戶千門通日月松閣平臨北斗迴蓮池倒映西山沒周流一水錦帆揚瑤草瓊花夾岍長蛟龍畫舞丹青洞翡翠春巢金玉堂天子八變時不御匹馬奔馳歛風霧回旋駐蹕人豈知伐鼓撞鐘日云暮五營萬騎羅九旒掃除閣道雲霄遊近侍誰陪柏梁宴將軍獨拜雷平侯哀歌少壯秋風起北伐南征心未已雷驅火衛出三邊虎驟龍騰掃萬里自從七寶棄人間桂梅蘭橈那復攀鼎湖只挽遺弓泣銀海難從賜劍還一朝天地成翻掌七貴上書要上賞丁傳憊懔肺腑深金張園沼恩波廣寂寞長思萬乘臨龍文赤日轉銷沉翠亭想像團華蓋綵仗虛無排碧岑四海爲家元不異泰山之封七十二意氣崢嶸父老嗟年光變化兒童戲登臨此地莫悲哀請看昔日黃金臺千金駿骨葬何處滿目荒丘

迷草萊

西苑詩十首

萬歲山

在子城東北玄武門外更出北上中門為大內之鎮山高百餘丈周迴二里許金人積土所成舊在元大內今林木茂密其巔有石刻御座兩松覆之山下有亭林木陰翳周迴多植奇果名百果園

葱鬱倚青天微茫散紫烟祖瀛符帝宅泰華鎮王川樹裏西山對花中北極懸登封非遠幸三祝配堯年

太液池

子城西乾明門外有太液池周凡數里水從玉泉流入延竟大內舊名西海子上跨石梁自承光殿達西安裏門約廣二尋修數百步兩涯穹翬出水下斗門鯨獸楯欄皆白石鑄鍊如玉中流駕木貫鐵緯丹檻犁之可通舟東西峙華表東曰玉螭西曰金鰲其北別駕一梁自承光達瓊華島制差小南北亦峙華表南曰積翠北曰堆雲

碧苑西連闕瑤池北映空象垂河漢表氣與斗牛通鯨躍如翻石鰲行不

斷虹蒼茫觀海日朝會百川同

承光殿

在乾明門外圍以甃城東西南隅開二門入梯至巔閣雉周迴皆設睥睨中構金殿穹窿如蓋雕栴綺墀旋轉如環俗名圓殿外周以廊向北皆金飾垂出垣堞間甚麗北直瓊島中有古栝二株柯幹虬偃蓋數百年物也堞繞門雙闕梯懸殿一攀飛甍承寶蓋列牖轉瑤環松古盤雲翠苔新帶雨斑三楊賜遊數稽首憶天顏

瓊華島

在大液池中從承光殿北度梁至島有熾洞窈窕橙道紆折皆疊石爲之其巔古殿結構翔起周迴綺牖玉檻重階而上榜曰廣寒之殿相傳遼太后梳粧臺今欄檻殘壞內金刻雲物猶彌獲棖棟間下布以文石傍一榻亦前朝物殿前舊有四亭曰瀛洲方壺玉虹金露今惟遺址耳詳見輟耕錄

碧池懸帝闕瓊島入仙家洞口流雲氣星濤湧日華桃源虛歲月蓬海復塵沙繡殿遊天女燕支映夕霞

藏舟浦

瓊華島東北過堰有水殿二一藏龍舟一藏鳳舸舟首尾刻龍鳳形上結樓臺以金飾之又一浦藏武皇所造烏龍船岸際有叢竹蔭屋浦外二亭橫出水面

鳳殿臨瑤水龍舟鎖白雲樓臺疑上漢簫鼓憶橫汾池豈昆明盤波猶太液分昔年浮萬里蘭桂詠繽紛

芭蕉園

承光殿南從朱扉循東水滸半里崇闕廣砌中一殿碧瓦穹窿如蓋上貫以黃金雙龍頂纓絡懸綴雕欄綺窗朱楹玉檻八面旋匝曰崇智殿殿後一亭金飾北瞰池水轉西至臨漪亭又一小石梁出水中亭八面內外皆水云釣魚臺殿前有牡丹數十株園名芭蕉豈昔有而今獨存其名耶歷朝實錄成于此焚草

輦道山樓直宮園水殿低碧荷春檻出紅藥晚階齊釣石蛟龍隱歌臺鳥雀啼翠華當日幸花木五雲迷

樂成殿

從芭蕉園南循水過西苑門半里有甃瀉池水轉北別爲小池中設九島三亭一亭藻井闢角爲十二面上貫金寶珠頂內兩金龍並降丹檻碧甃盡其侈麗中設一御榻外四面皆梁檻通小朱扉而出各涵碧亭其二亭制少樸梁檻惟東西以達厓際東有樂成殿左右楹各設龍床殿後小室亦設御榻皆宣皇遊歷處也殿右有屋設石磨二石碓二下激湍水自動蓋南田穀成于此春治故曰樂成

金隄迴北拱寶殿樂西成春急奔湍上梁危架石行池龍蟠九島苑島下層城帝豫因民事長楊愧頌聲

南臺

從樂成殿度橋轉南一徑過小紅亭二百餘步林木深茂內有殿曰昭和皆黃屋傍有水田村屋先朝嘗于此閱稼

灌木晴湖合萬花午樹移堯茨元不剪周稼欲先知雨露懸蓬徑風雲護竹籬九重歡豫並綉纛見龍旗

兔園山

從南臺達西堤過馬苑有兔園其中盤石爲山穴山爲洞東西分徑盤紆

而上至平湖又分繞至巖布甃皆陶埏雲龍之象砌上設數銅甕灌水注池池前五盆內作盤龍昂首而起激水從盆底一竅轉出龍吻分入小洞由大明殿側九曲注池中殿傍喬松數株參立百藤縈附于上復懸蘿下垂池邊多立奇石一名小山子雲梯盤石迥水洞穴山深龍壑春雷鬪蛟官晝日臨壁金飜竹色檻玉落藤陰誰作梁園賦還來奏上林

平臺

太液池西隄出兔園東北臺高數丈中作團頂小殿用黃瓦左右各四楹接棟稍下瓦皆碧南北垂接斜廊懸級而降面若城壁下臨射苑背設門牖下瞰池有馳道可以走馬乃武皇所築閱射之地又後左門左翼室亦曰平臺今上嘗召見內閣諸臣于內賜詩

曲臺通太乙複道肅鈞陳虎旅
崑營久龍光繞禁新栢梁開口月蓬閣接
天人漢帝崇文化廢歌奉紫宸

文徵明西苑詩後記云嘉靖乙酉春同官陳侍講魯南馬修撰仲房王
編修繩武偕余爲西苑之遊
先是魯南教內書堂識守苑官王滿是日

貞導余三人行因得盡歷諸勝既歸
府迥出天上非人間所得窺視而吾
暇日遊行其中獨非幸與然而勝踐
南追思舊遊可復得耶因盡錄諸詩
詠殆猶置身於廣寒太液之間也是

以所記憶爲詩十篇竊念神宮秘
院際會清時列官禁近遂得以其
難逢佳期不再而余行且歸老江
菽之他時邂逅林翁溪叟展卷理
歲四月既望識

郊壇燕集

北極冠纓紫氣分南郊樓閣坐氤氳
二月衣沾星殿雨九天杯覆露盤雲莫

啼苑樹瓊筵合燕蹴壇花錦瑟聞
言詞賦甘泉絕欲向仙都誦赤文

北嶽二十韵

代郡高誰闢恒山鬱自盤頂浮天地濶
宅安省方玄帝始分野紫垣端錦繡虛
檢奉千官俎豆行冬殿琴碁駐曉鑿觀
秀三時雨電寒穴風生虎吼崑瀑注龍
曾旬服燕趙自泥丸氣滌腥羶雜烽消
鍾乳猶懸穗金芝卽捧槃碑蘿翻翠壁

傍掩日星殘形勢并門扼威靈莫
無出銀鈔縹緲看寶符傳七聖玉
碑垂歲月窟石鎮林巒百里烟霞
蟠橫塞襟長白穿胡帶紇干魏遼
岫嶺攢東嶺滄海嶼北控黑河湍
松栢護瑤壇雲步名仙會脂圖大

隱歡障開峰繞碧社人竈還丹拄杖思黃鵠飛車問赤鸞真源何竊窺不
獲挂纓冠

過玄明官故址有傷往事六十韻

白日登遙陌玄明問故宮變桑徒靄靄秀麥只芄芄伊昔虞廷上茲闕漢
幄中腹心推帝主權位竊奸雄巷伯詩篇重門生禮數崇閣臣行雅默戚
里坐昏惰自恃回天勢誰分轉日功憲章更七聖奴僕視諸公左順衣冠
謁東河奏疏通笑談傾海嶽呼吸動雷風鐵券啣恩異銀璫拜德同巖廊
逢翹翹國社倚猿狖刃血陳蕃懸囊頭孟博忠急流翻俊又直道若愚瞠
紈殺牢憚物肥甘簋厭饒珍奇重譯至歌舞四方工甲第聯岑嶸長安表
蔚葱弟兄爭閭闕親暱獲忻懽繡屋頻經始琪園欲送終夷墳開碧盈奪
宅失彤弓南國梗樟盡西峰土石窟高居真玉帝侍立儼金童兩觀懸朱
日三梁架綵虹蛟螭蟠棟赤琥珀挂簾紅鑿水規濱渤爲山象泰嵩千門
逸紫霧十閣槩玄穹丘壠圍丹竹祠堂列錦楓深林遊鹿豕仙域守羅熊
雷雨何靈怪星辰欵杳濛誥牋垂綵鳳頌筆著雕蟲碑字黃扉出桑章翠
殿克人情知損益天運驗衰隆赫怒竄文勇哀矜感舜聰簡霜纓甫殺評

月亦朦朧書記殊邦斥謳歌一旦空夏門題賊榜陰闥繫官僮火向寒灰
滅冰緣皎日融臍鬪然董相眼底見胡种大市喧壘粉佳城惜梓桐暗簷
惟雀網廢井但麋茅階澁莓苔跡壇荒枳棘叢香鑪沉縹緲翠帳落玲瓏
怨鶴應啼柱哀駝竟化銅開人稀陝洛羽士合崆峒傳舍存三島陪陵罷
九嶷綽頰元世改巢破豈時蒙黠慘無行馬淒涼有去鴻川迴沙苑外臺
圯堞樓東嘯鼠穿殘瓦啼狐出敗樅烟光浮宿草風色斷孤蓬銜達還重
孽恣睢更腐躬群英虛寵貴萬姓實疲癯驥伏雲霄捩鵬翻日月籠操刀
懷必割奉壁恨難攻幹斗憑機速旋鈞借力洪告猷多齷齪布法或耗氈
音急看張瑟詞繁想受筒履祥搜虎尾畜吉牯牛撞望已衡留傳占猶劍
在豐瑤編闡讜議寶鑑仰宸衷

擬古宮詞

二首

上林羽獵載紅粧內苑新開六博場采色滿盤消永漏不知紈扇冷昭陽
春夜鳴鸞去狹斜黎園歌舞妓如花教聲羯鼓催瑤月一曲涼州駐綺霞

王僉事謳

謳字舜夫白水人正德丁丑進士除工部主事改刑部員外遷按察司僉

事填宣府引疾歸卒年三十六舜夫風神散朗負氣任俠有高才而無貴
仕故多煩促噍殺之音五言隱秀時可尋味七言專力學杜古體多率易
而乖音節今體每纏綿而乏神理然其視關中同時許伯誠馬仲房之倫
則已超乘而上矣詩曰彭衙集自正德戊寅逮嘉靖丙戌才九年所作近
千六百篇漢東顏木爲序

昌平道中

天地路何限此生隨馬蹄愁來思白髮
曙鷄無才漸姓字何事在金閨

老去倚青藜塞笛行殘月山城起

夜坐書懷東劉伯叙

一官彌歲月爲客久京華道路愁長寒
驚鴉身愧虞翻老疎狂祇自嗟

田園憶故家沉雲風散角栖雪夜

龜山戰歌

龜蒙連天五百里流賊薄人據山趾白
數道分兵屢合圍屈強衝突心甘死綠
賊勢陸梁金鼓微軍聲震喊旌旗靡早

自公行誰復何寡人之妻孤人子
衣繡袂紅裹頭手劔鋒鉅來此此
北已敗揚將軍兄弟二人化血水

青州鹽徒與賊通千金賣却今如此青
草茫茫白骨寒可憐爾命如虫蟻
諸軍奔散似雲崩解鎧揮戈無寸矢天
昏地黑少人聲尚有歸魂哭戰塋

秋夜聞雁 二首

最苦思鄉泪今宵爲汝多秋陰連海嶽
歸路識星河未信附蘆葉真能捍
網羅楚雲一萬里故渚擬須過
擬向江南去能忘塞北居清霜千樹殺
白髮一行疎着眼江湖窄傷心歲
月虛亂愁消短燭深憶故園書

新歲偶書

一身行遠塞萬事付閒愁獨坐看新歲
長歎感舊遊雲生故國樹角起夕
陽樓踪跡憐方朔乾坤世總浮

立春後一日寄京中諸友

紫禁寒多未見花萬年枝上散啼鴉
橫街內制螭頭出殿轉宮車雉尾斜
寶鼎晝薰香篆合畫屏春簇漏聲賒
笙歌猶自迎王母青鳥蟠桃共歲華

小酌

有客素情好過我持芳尊秋月鑒幽賞
緒風開夕園慙勤申款曲歌笑屢

飛翻叨厠衣冠會喜聞壘岫言醉來不覺晚相送出柴門

汶上公署

百歲爲浮名一身恒旅寓鴉啼野樹昏角散城雲暮殘壁竄秋蛩空階滴
夜雨愁心似繭絲短髮變玄素

偶成

茂林鬱如蓋雜花絕欲然啼猿驚客散舞鶴到尊前蕙帳養霞影竹窗照
月妍時有故夢人伴茲清夜眠

暮雨獨坐

夕雲起山澤廣陌鬱幽沈北風吹雨雪寂樹無歡禽天涯莽寥落行子斷
歸心却住盛年邁潛來愁思侵高樓厲清角虧景蔽蒼岑輕舉積淵抱揭
懷伸素襟寒冬芳意歇爐焰澄香陰還憶故園夜携酒仍抱琴

獨臥

獨卧轉病餘寒帷懼寒入林風鳥亂鳴山雨夜來濕爐薰壁景沈曙啓簷
光集飲澗學長生胡爲在城邑

殘月偶興

霜露凄苦寒，殘月空城陌。愁客自無聊，閉門坐遙夕。乏歡尊委塵，暗影鏗
搖壁。水氣浩林遠，帶月澄虛白。起視夜方中，孤雁東南適。

冬日閒居雜興

枯葉下風林，沉沉廣庭晏。衆鳥還故棲，浮陰相與散。霜清野水明，天遠連
山斷。愁雲黯自銷，猿嘯驚還亂。獨坐閉蓬茅，淹留節序換。

夜行

夜行如在旦，殘月清林光。雲氣生深澗，露華從蚤涼。白沙鬱浩浩，翠壁凝
蒼蒼。寂歷松栢徑，經過花草香。鷄聲互村落，曙色動柴桑。卽事况多感，離
心含永傷。

南紹興元善

元善字伯子，渭南人。正德辛未進士，歷戶部郎中，知紹興府。從王伯安講
學，復王右軍、謝太傅爲權貴所疾。嘉靖丙戌，大計罷免，歸構潛水書院以
教。後學有瑞泉集一卷。

和馬仲房出塞

虜騎還南下，王師復北征。旗翻滄海日，道出白登城。朔馬鳴新壘，胡姬指

舊營玉京雙鳳闕空宿羽林兵

前巡幸歌二首

翠華搖曳轉龍荒宣府離宮面面長代馬繁纓懸廣室胡姬粧鏡掛連房
鐵柱旌旗白晝懸潯陽烟火上薰天羽書夜報鷹房裏駿馬朝鳴虎帳前

閒居二首

落落新榆宅深深細柳村出門逢鳥雀歸院見鷄豚
碧窗紅藥砌青簡綠牙籤花落鶯啼樹風回燕入簾

劉副使天民

天民字希尹濟南人正德甲戌進士除戶部主事諫南巡廷筭三十改吏
部稽勲泣諫大禮又筭三十歷文選郎中調壽州知州臺諫論救不報凡
京官外謫出都門以眼紗自蔽希尹過部門選人數千擁其馬不得行擲
眼紗于地曰吾無媿于衙門使汝輩得見吾面目耳累遷至河南副使改
四川乙未考察以貪罷王道思序其詩稱其爲豪雋傲儻之士屢擢而稍
進一進而輒斥晚年好爲詞曲雜俗兼雅歌者便之李中麓云濟南劉副
山以副使罷官憤憤不平作三胡十八一套仙呂有云嚼口根青瓊郎綽

口氣黃閣老把俺這無嫂嫂的陳平也中下一箇招又云飽鴉林多大以蔡
藉腸容易飽擊一既村裏茶抹一篇窓下稿其託寄感慨如此

秋日與客入西安門達觀內苑望遼后粧樓作長句

朝退過西苑仙游歷尚方彩雲迷禁籞綺樹隱齋墻玉圮聯馳道金鋪鏤
洞房路看張錦徧水識棄脂香傍岸蘭生殿連蠟玉盤堂雕欄淩霧雨碧
瓦淨烟霜靚不飛鵲樓高翫鳳凰弋林通別館釣渚接迴塘虎氣騰深
閣鷹聲出內坊露臺嗟盛代供帳陋前王萬歲各山地千秋置酒場參差
國寶船左右翔貂璫負寵魚相貫希恩鴈列行談諧從曼倩竊窺得毛嫵
巧藥翻新曲芙蓉避靚粧風塵驚頰洞花鳥輟輝光蠋篆封珠戶蛛絲絡
象牀藤蘿空冉冉葭莖自蒼蒼北闕更新主南薰鼓舜臯風車停警蹕貢
使絕舟航豈獨群工起還令庶事康太平真有象聖壽合無疆謁者秋容
老官娃午夢涼抵今懷短筆詎用賦長楊

春日周都閭招飲其宅蓋亡友梁國史第愴然興感

樂事從於客歲違賓筵嘆息主人非平章宅舊花仍發王謝簾開燕自飛
寒火尚供沽到酒春蛾爭化舞殘衣黃金莫惜沉酣盡白髮何堪故友稀

發草涼樓驛一十里飯一黎姓僕和壁間任少海韻一絕

紫巖山閣倚殘霞素雪回看靜碧沙未有東風消不得隔林猶似葉珠花

周按察廷用

廷用字子賢華容人正德辛未進士知宜黃縣入為御史未一載補外為
僉事參議福建兵備四川進江西按察使請嚮不行入覲都御史汪鋐摘
黜之顧華玉曰子賢才稟超融文鋒迅湧兼能博涉強記滋培詞本故援
筆長賦爛然成章氣調備彙所不宜于俗為御史言事多觸時忌及為監
司不善遷合失權近意有八厘集若干卷華玉于子賢極相推挹今觀其
詩粗豪奔放往而不返益楚士之有才情而不諳于格調者

春晚事隙偶作

吏道謝迫東疑神悅閑敞縱步綠堦除流目睇林莽荃蕙吐芳蕤山泉發
幽響風聲繁閉帷月華洞虛幌伊于奉玉命間歲居遊壤簪筆忝所荷鼎
食規厚享英達久睽攜謫薄愈迷罔且自飫丹經聊以遂愒仰

閒詠

寂寂抱空虛暇日阻游豫散帙散餘清沈瑟銷遺慮纖榮吐芳辰弱華衰

清曙丹葩曜春曦白楊號日暮層空替歸
雲修岑暖行霧引領洞庭涯非
個不能去借問此何爲要以世網故柱下
徒栖栖功業未由樹悵哉攬轡
途漠爾埋輪路休澣循子躬且誦閒若賦

過倒馬坡

未識埋輪路重經倒馬坡赤霄開棧道白日蔽雲羅古磧羊腸遠飛泉鳥
背過張生銘劔閣千古仰嗟峨

汪大理文盛

文盛字希周崇陽人正德辛未進士除饒州府推官入爲武選主事諫南
巡拜杖嘉靖初出知福州府歷副使按察使拜僉都御史巡撫雲南進大
理卿移疾歸卒

西苑二首

萬年枝上露華清百子池邊月色明官草經秋猶自碧君王御筆不曾行
昭陽歌舞正淹留羌女新來勝莫愁曲盡胡笳十八拍爭扶玉輦下瑤樓
歲暮供事奉天門述

千里宸遊幸舊畿金陵長見五雲飛隔年旌旆開玄武永夜星辰動紫微

天苑塵隨司僕馭御營花映後宮衣荒村處處催夫役悵望軍門消息稀

胡判官侍

侍字承之咸寧人正德丁丑進士授刑部主事歷鴻臚少卿嘉靖初追尊獻帝議者力辯兩考之非承之上言祖訓兄終弟及蓋嚴嫡庶防覲覲西魯嬰齊不受命婦父漢病已不受命昭帝何以受命爲菴唐府宗不當兄中宗宋太宗不當兄建社以其爲君也不當稱兄則不當稱伯明矣上怒其狂率出爲潞州判官乙酉下詔獄除名爲民戊戌有詔追復承之初以不附濮議謫官厥後下獄不知所坐許伯誠志其墓駢語墳墓無所考焉

城夜

露下庭皋秋夜清星河冉冉動高城林鳥自避厨烟宿旅雁孤隨海月鳴
塞上風雲還瀆洞客中鐘鼓最分明金支翠節歸何晚璧水瑤山擁漢京

扈駕郊壇陪祀

朱壇晴雪媚春空雲從天行氣象雄八駿宛迴黃竹路六龍遙向玉華宮
爐烟半拂仙人掌樹色微翻少女風應有海神來候駕南端非霧碧冥濛

登漢武帝玄都壇

曲登回谿數百重漢皇行幸有遺蹤海西不復來三息疑呼虛傳駐六龍
碧露暗滋金洞草紫雲常護石壇松便應別著登山屐策杖高尋五檢封
辛丑卽事

查惠孫吳略人人衛霍才祇能壁門裏目送虜群回

採蓮曲

棹謳宛轉發中川隊隊紅粧競採蓮欲就前路問名姓蓮花當住木蘭船

涼州詞

落日黃河水倒流沙塲旌旆風悠悠新降胡奴不解語笛中吹出古涼州

赦布政英

英字子發清江人正德辛巳進士由南刑部歷陝西河南學憲官至河南

右布政

塞上曲

軍中頻宴樂醉後擁雕鞍紫塞連天遠黃雲拂地寒老兒叱撥馬胡女固
姑冠兩兩三三去營門倚笑看

太岳紀遊二首

千峰秀色倚天開萬壑春流遶地迴太子坡前一雙鶴迎人飛過石橋來
偶來雲臥紫霄宮露洗瑤臺月浸空夜半星官朝北斗步虛聲在萬花中

輞川謁王右丞祠

蜀棧青驃不可攀孤臣無計出秦關華清風雨蕭蕭夜愁殺江南庾子山

秋興呈華泉翁

池頭一雨送新涼小坐茆亭月近床和得竹枝三百首西風無雁寄瀟湘

挽蕭南塘

笑君意不盡觀化竟如何擬結香山社俄聞薤露歌漆燈寒雨暗鄰遠晚
風多他日南塘路傷心不忍過

挽符穎江

吾鄉無此老故舊覺蕭條刻竹曾聯句尋芳憶並鑣酒船虛問字花月罷
吹簫何日遶東鶴啼來感市朝

齊按察之贊

之贊字瑞之桐城人正德辛未進士改庶吉士授給事中八年以考察落
職量移南刑部遷陝西副使督儲甯夏乞致仕歸早負時名諫垣多所論

列在靈夏營上蓬獻疏剴切爲時所稱

將至花馬池王恭將郊迎設食

崗嵐迴合日光斜
森森金疊坐剝瓜
蔬徑潤舍終伏雨
禾田青覆去年沙
勞庭北徙邊烽少
賓雁南飛朔氣加
驛使只今勞戰馬
兩池愁聽損鹽花
大小池監利分給
軍夏榆林甘肅三
邊買馬

過田州故城卽唐朔方軍也

河外軍藩麥秀中
唐兵昔數朔方雄
韓公北輯三城路
至德中興一旅功
番刻勁銷春蘚碧
漢花穠映寺門紅
高雲不罩田州塔
水鶴歸巢綠空

赤木山下閱視新塹

山靈受整劃龍沙
寂婦孤兒喜有家
碧草暗斑遺鐵血
黃雲平覆戰場花
歌風赫鋪穿林麓
接社壺單愁水涯
心悅子來延竚久
唐渠秋樹亂昏鴉

張賓客邦奇

邦奇字常甫鄞縣人弘治十八年進士改庶吉士授翰林簡討居三載以親老乞便養出補湖廣提學副使再以病免起四川福建提學遷春坊庶子國子祭酒南京吏部右侍郎召還京爲吏部左侍郎以學士掌院以太

子賓客禮部尚書掌詹以母老數上疏乞骸骨改南京禮部尚書又改兵部叅贊執務卒于官贈太子太保謚文定常甫在史館焦段諸人附壁熏灼常甫以養親請外在銓部汪霍爭寵張桂驕橫雖上有意獨用而卒以母老乞南張司馬時微與常甫同五世祖爲常甫立傳論及出處之際嗾嗾乎有未盡焉

題画

鴝性愛雨花愛晴同倚東風不同情春光二月濃於酒雙鳩醉寐不復鳴雙鳩不鳴花相語無令鳩醒叫天雨

雲安仙客行贈王五峯都憲

放舟下魚復勢與蛟龍爭緯繡雲搖三峽影微茫月照萬川城可憐萬里飄蓬客蒼蒼昔露冷東山石見說仙翁此結廬暫向雲陽停挂席是時邊關豺虎驚朔風正攪黃沙磧翁昔威靈遼海間今皇拊髀興歎息問翁翁不言舉觴視遙天願續扶嘉隱高歌郭子篇青燈白髮照奇骨永夜玄談真風緣五峯拔秀出浮塩百壺雅致忘高年君不見益世英雄固陵道只今但見虞姬草又不見揮金買賦悲長門時違屏棄如孤豚風塵廿載無寧

處黃鶴乾坤成再舉一醉翁家麩米春江臯細瀝如酥雨

三江以荆門復會作詩識喜次韻

自吹疎狂甚窮通不顧渠隨緣關意馬乘興解腰魚世業遺殘硯行資在
券書十年吳會想今日并消除

九日宿院

玉署逢重九秋花傍苑墻天涯來弟姪客邸似家鄉槁葉池魚響深松海
鶴藏院虛宮漏永趺坐月微茫

送李巨川

高蹤不可及羸馬過溪橋欲別青山暮相看白髮饒斷烟橫遠浦急雨亂
春潮望望僊旌盡鳥鳴雲樹遙

冬日雜咏 三首

落葉打尊益空山酒自波九歌淒宋玉三易老田何赤岸疎楊柳高檐響
絳蘿歲寒心想絕朋舊已無多

草枯遼野曠牛飽背童歸獨鶻饑偏厲孤雲凍不飛松風哀澗玉苦石叟
寒衣霜白鳴鴻遠澗光濺竹扉

滿目悲生事玄陰
鞭夕暉對村燈
燭冷穿幄笛聲微
改火仍通舊
饑年半習非
枉教啼絡緯
勤織也無衣

夷陵山行至九灣絕糧

路險仍遭雨人疲又絕糧
山花空的歷我馬自玄黃
草屋家家破秋田處處傷
昔年羈宦者青史著歐陽

述懷答東田弟

六十不歸去八年空及瓜
何時觴北濟陪汝奔東沙
仙搆須依竹吾廬亦寄槎
賡吟猶有日棠棣正敷華

上巳日周玉巖司寇拉遊蔣山枉詩見惠次韻

郊行長爲簿書遲勝友壺觴已翠微
夾路桃花迷入洞傍溪鷗鳥憶臨沂
松陰坐久還移席草色春深欲染衣
紅日下春湖水碧石橋齊踏彩霞歸

次韻寫懷

春雨蕭疎老紫荆
磽田下溼自留耕
林中果熟呼兒摘
谷口人來聽鶴迎
江郭好風催月上
海樓晴日看雲行
關門令尹今誰是
隨處青牛得避名

夏日村居二首

巴川日夜苦離愁
乞得歸來宿願酬
遍插園蔬防舊客
豫栽籬菊待清秋
池亭坐愛青田鶴
郊牧行牽甯戚牛
着荷衣心似水
臥聽涼雨竹邊樓
風搖菡萏響高簷
裝裱殘書手自籤
鳳管玉樓邀素月
碧筒深樹遣朱炎
東臯過雨施長屐
南畝逢秋試短簑
筮仕廿年家食半
獨于山水性非廉

午風亭爲序菴太史

青草池邊綠樹枝
晴空白日颺遊絲
湘簾半捲飛花入
正是午風吹客時
建輿卽事

亂峯堆裏禪居隱
落日松風興無盡
山僧乍喜遠客來
手把長鏡斲新筍
潘侍郎希曾

希曾字仲魯金華人
弘治壬戌進士授兵科給事中
抗疏忤逆瑾遣往湖
貴計處邊儲復命下獄拜杖除名爲民
瑾誅復官歷陞工部侍郎治河有
功改兵部贈尚書

岸柳

岸柳綠絲絲
春風不斷吹
昨來誰此別
留得折殘枝

汪侍郎玄錫

楊花不來楊葉愁江水晝夜隨東流

明妃曲

黃金不買畫圖中從此春花閉漢宮
得君王議傾國無人主議罷和戎

蔡侍郎昂

昂字 淮安人正德甲戌探花除編修官至禮部左侍郎贈尚書

送劉布尹同年

冥鴻得意且高翥鷲鳥高飛正刺天元
痴党人滄海上貞元朝士曙星前
烟花紫禁同遊少風月孤舟別夢牽
遙憶政成多暇日郡齋還紀著書年

汪僉事應軫

應軫字子宿山陰人止德丁丑進士選庶吉士已卯與同館舒芬等七人
疏諫南巡跪門廷杖瀕死出知泗州武宗在留都中使傳旨令泗州進美
人善歌吹者數十人奏言泗州婦人荒陋且多流亡無以應教旨臣向民
間乘婦倘蒙納之宮中俾受歡事實丁治化有裨事遂寢世廟發極召復
館中出居諫垣一歲中章奏數上皆落落天下大事以親老乞改南與永
嘉安仁同官南部方講大禮欲倚以爲助議不合卽上疏請遵典禮崇大

視以安人心張桂並大用出爲江西僉事謝病家居復起提學文憂歸卒
于家鄉人私謚爲清憲先生有青湖集

鳩隱

鳴鳩拂其羽四海皆陽春秋風起颺鳩蓬棘深藏身時哉有顯晦微鳥靈
于人孰謂鳩性拙而同鳳與麟

送舒國裝修撰調閩船提舉

庖祝有分守而欲侵其厨峨冠何如人携我相與俱微哉京隱身誰爲獨
濯壺芳臭自云薦公尸色未愉攝衣入廟門匍匐投遐區同愆不同諫無
乃矜庸愚相期厲珪璋臨別重踟躕

題百雀園

百雀不如賦胡爲占琅玕朋雛碎語不可聽六月攪動清風寒我欲挾金
彈巧避千萬端徘徊恐落一枝翠矯首待鳳棲闌干

望田家

數椽茆屋傍山開橫麓平簷雪滿堆耳畔春風選料叨田家錢簿尚塵埃
雞豚詫客穿籬入牛馬別人際晚回何事鄰翁喧笑語爲儲舊穀接新來

書武陽驛

小驛春深綠半斜東風開到刺桐花夜來有夢難分別半是長安半是家

汪京府循

循字進之休寧人弘治丙辰進士歷官順天府通判

明妃

將軍杖鉞妾和番一梳承恩出玉關死戰生留俱爲國敢將薄命怨紅顏

李思恩訊

訊字彥夫祁門人弘治癸丑進士歷官思恩軍民知府

柳枝詞

不唱春風楊柳詞繁華過眼已多時于今楊柳非前比無此繁華無此悲

江上懷釣隱翁

向夕蟬鳴疎柳斜煙光國外淡江沙潮來月上無人釣落盡西風白藕花

黃長樂瑜

瑜字廷美香山人以鄉薦入太學上六事不報知長樂縣未幾蟠老著然
規歲鈔十卷紀載國事四十年而削髮采佐以論德掌留院於堂東楹中

得吳元年以來案牘乃足而成之

昌華苑 南漢劉鋹建

江水東流西日斜劉郎綦跡尚天涯昌華苑外裙腰草玉液池邊鼓吹蛙
隔墻牛羊聞牧笛遙林燈火見漁家當年翠輦曾游地留與東風長稻花

黃侍郎衷

衷字子和南海人 進士官至兵部右侍郎致仕

春思和學湖

為戰酣春止酒難雲林懸媿竹皮冠鳩綠報雨動相聒風欲開花澹不寒
月俸贏錢炊桂了夜堂燒燭借梅看枕屏莫卜勞勞夢我是空門古懶殘

陳副使叔紹

名振以字行閩縣人精春秋學少無宦情不就有司辟劉忠愍與其兄叔
剛善勸之仕補博士弟子員年三十矣正德十年舉進士選監察御史陞
廣東副使叔紹有孝行母病嘗糞以驗差劇閩人至今稱之

丹陽湖

積水涵太虛一望何瀾瀾風濤漾輕縠霞光映文綺遙山鳥外橫孤棹沙

邊巖漁家夜語聲深在蘆花裏

李給事鳴鶴

鳴鶴字九皋義烏人正德丁丑進士歷官大理寺丞兵科左給事中以剛直罷歸

雜興

朱陽媚初夏庭宇生閒情幽禽奏新響嘉木敷柔榮餘寒逼春服浮陰妨
聳晴雲頽山翠重雨過林香清獨步還獨坐取適夫何營興至發高咏潏
然心自平

秋思

燭暗夜已深秋蟲競相語驚風灑蕉葉冷露散如雨奈此留滯客愁緒不
可數白髮日以繁青山渺何許

山居二首

石洞幽迴處深林下鹿群溪喧前夜雨鳥語半山雲樹暗聞嵐氣巖明見
溜文藤花照潭水風日共紛紛

石壁日初上春山風乍晴偶隨黃犢出閒傍綠溪行幽鳥淡無語落花如

有聲迴看飛瀑下樹杪白雲生

題西美人

一夜春風發芳心不自持
晨携女伴花下對彈碁

朱貞外疏

疏瀘州人正德十一年進士南京戶部員外郎

舟曉

鷓鴣將雛護石根
菴苔綴纜襟
衣痕幾椽茅屋生
春色無數桃花燒野林
所歲鄉儺蕭鼓咽
坐風舟子笑歌喧
蓬窗與劇誰憐汝
喚取青峯映綠尊

蕭宗

宗字

香嚴寺詩二首 寄嵐州

方丈香銷客未眠
出城頓覺夜如年
烏啼霜落僧歸院
雲滿空山月滿天
烏啼霜落夜漫漫
風入疎櫺客枕寒
戍鼓敲殘雞亂鳴
半軒明月照欄干